

# O LE SULU SAMOA



EKALESIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



**FAAVAEINA 1839 O LE SULU SAMOA AOKUSO 2021**

email: [sulusamoa@cccs.org.ws](mailto:sulusamoa@cccs.org.ws) - Main Office: Ph. 24414, Ext 30 - website: [www.cccs.org.ws](http://www.cccs.org.ws)

## LOTU FAAFETAI EFKS LETUI - PUNA'OA O LE TALA LELEI



**MAFUTAGA FAAFOUINA AUFAIGALUEGA 2021**

# **FAASINO UPU**

<b>1. O LE LAUGA</b>	<b>2</b>
<b>2. LOTU EFKS LETUI, ITU O TANE</b>	<b>5</b>
<b>3. O LE PEROFETA MULIMULI</b>	<b>8</b>
<b>4. O MEA'AI TATAU MA LE ASO</b>	<b>12</b>
<b>5. O E UA FAI I LAGI FOLAUGA</b>	<b>15</b>
<b>6. ATA O E UA FAI I LAGI FOLAUGA</b>	<b>16</b>

## **O LE LAUGA**

Tusi Faitau : Kalatia 1 : 1 – 10

MATUA : Kalatia 1 : 10

*“Ou te fa'aaviavi nei ea i tagata, poo le Atua ?  
Ou te saili ea ina ia ou faafiafia i tagata ? Auā  
afai ana ou faafiafia pea i tagata, po ua le fai  
a'u ma auauna a Keriso.”*

*(“Am I now seeking the favour of men, or of  
God ? Or am I trying to please men? If I were  
still pleasing men, I should not be a servant of  
Christ.”)*

**MANATU AUTU : E LĒ O LENĀ, A O LENEI  
IA KERISO.**

Soo se tagata soifua ua fa'aaupagaina e le Atua e filifili mo lona lelei manuia, e i lona natura lona saili, mo se isi lalolagi ina ia ola manuia ai. Na faia e le Atua Atamu ma Eva, ma tuu i le faatoaga ma saoloto i manuia o Etena, i laau ma meaola uma, vaganā le laau e tasi, 'aua lua te papa'i i ai. Ua fa'aooso le gata ia Eva, “E lelei le laau pe a 'ai, e te maua ai le ola. E te iloa ai le lelei ma le leaga.” Filifili LENEI, ae lē o LENĀ. Talofa ia Eva ma lana filifiliga, ua faasesēina Eva, faasesēina Atamu, faasesēina ai le lalolagi atoa. Ua FILIFILI i lenā, ae lē o lenei.

Na maliu lava foi le Alii o Iesu o feagai pea ma le anoanoa'i o filifiliga eseese, Pe filifili lenei, ae tuu lenā? Na afutoto le Alii i Ketesemane ma fai atu, “ia 'aua nei faia lo'u loto, a o lou finagalo.” O le taunuuga lenā o lana filifiliga. Ia maua e le tagata Lana faaolataga. Filifiliga o lenā a e lē o lenei.

O lea foi se vaaiga i le taaviliga ua soifua ai o tatou tagata Samoa, ma ua lē faigofie ai a latou filifiliga, po

o fea le mea lelei ma talafeagai ma le mana'o o le tagata ma manuia ai le lumanai. Ua saili i atunuu i FAFO o tatou tagata. Ua manatu e SILI FAFO nai lo Samoa. O le FILIFILIGA. Ua faatusatusa i i o, o i i, ua lē o lenā, a o lenei, ua lē o lenei, a o lenā. Filifiliga ina ia manuia.

O le mataupu lea i FILIFILIGA o loo faasoa ai Paulo ia Kalatia. I le manatu o Paulo, o le Tala Lelei ia Iesu Keriso, o le tala lea mo le ola manuia o le tagata faatuatua. O le ala foi lea sa fitāituga ai le Aposetolo o Paulo e tala'i atu le Tala Lelei ia Iesu Keriso i nuu ese. Ina ia maua e tagata o nuu ese le manuia o le ola. E ao ia i latou ona talitonu ma faatuatua ia Iesu Keriso, o Lē ua faatūina mai le tuugamau ma le oti. O Ia o le Faaola.

O le FILIFILIGA o loo 'ava'avau ai Paulo, e lē faatatau i aai ma atunuu e FILIFILI ai mo se manuia o le tino. E LEAI. E lē se filifiliga pe sili Kalatia e maua ai galuega mo manuia o le tino nai lo Korinito. Pe faapea foi e sili atu Kolose nai lo Efeso i le nofo ma atia'e manuia faatagata. E LEAI. A o le FILIFILIGA e tāua ia Paulo, o le FILIFILI lea o Keriso ma ala moni faaKeriso, e maua ai manuia.

O lona uiga, e lē o le atunuu o loo saili ai le manuia o le tino e tāua, a o le Tala Lelei ia Iesu Keriso, ua faatalaleleiina ai atunuu uma o le lalolagi, o le mea sili lea ona tāua. O sina tala o Kalatia:

O Kalatia [*ua ta'ua o Take(Turkey) i nei ona po*], i taimi o Paulo, ua lē o se nuu e tasi, a o le itumalo [*region*], e tele aai e i ai. Ta'ua i le Tusi o Galuega a le Au Aposetolo, o le itu i Saute o Kalatia, na afea i malaga faamisionare a Paulo, ma tala'i ai le Tala Lelei ia Iesu Keriso i aai o Anetioka, Ikonio, Lusa ma Teipe, ma o nisi ia o Ekalesia i Kalatia, o loo faatatau i ai le tusi lenei a le Aposetolo. Taofi le au su'esu'e, sa faasavali le lauina o lenei tusi i lea Ekalesia ma lea Ekalesia. O le tusi atu lava la o Paulo i Ekalesia nei, o le tusi faamalosi'au mo le au Kerisiano, ina ia FILIFILI ia maua le Ola ia Keriso. E lē o lenā, a o lenei ia Keriso.

I le folasaga amata o le Tusi, e leai se agaga faafetai o Paulo ia Kalatia e pei ona masani ai folasaga amata i ana tusitusiga, pei ona tusi ai i Korinito, Efeso, Filipi ma isi. Ua manino lelei ai, ua lē o fiafia le aposetolo. Aisea? Ua i ai tala'iga sesē, ua ofi i totonu o Kalatia, ma ua faasesēina ai le au Kerisiano. Ua liliu 'ese mai ai i le faasinomaga tonu, na tautigā ai le Aposetolo. Sala la ina lē fiafia Paulo, auā ua se'e 'ese le faavae o le ola faa Kerisiano moni, e tusa ma a'oa'oga a le Tala Lelei ia Iesu Keriso.

---

f.6, “*Ua ou ofo ina ua faapea ona vave liliu’eseina o outou i lē na na valaauina outou i le alofa tunoa o Keriso, ae faasaga i le tala lelei e ese.*” O le upu ‘ofu’, ua faamatalaina ai le lagona māsiāsi o Paulo, ua tu’ua e Kalatia le ola ae faasaga i le oti. Leitioa foi Paulo, ta’ua Kalatia, o tagata vālea, auā ua tu’ua le ala moni, ae ua ‘apo ala sesē, ua foliga ai, o se vaa folau ua leai se tapasā.

Fai mai upu o le tatou matua,

“*Ou te fa’aaviavi nei ea i tagata, po o le Atua? Ou te saili ea ina ia ou faafiafia i tagata? Auā afai ana ou fa’aafiafia pea i tagata, po ua lē fai a’u ma auaua a Keriso.*” O upu ia a Paulo, e faailoa atu ai, lana ia filifiliga. UA IA FILIFILI ia IESU. A toe liliu upu ia a Paulo i se isi faaupuga, ua fai atu, TALU AI LO’U ALOFA MONI IA OUTOU KALATIA, O LEA OU TE LĒ FA’AAVIAMI ai ia outou.. OU TE TAUTALA MALOSIIA OUTOU, ona o la outou filifiliga, ua FILIFILI i lenā ae tuu lenei. E LĒ MAFAINA OU TU’UNA OUTOU E FANO I LENĀ. Ua ou leo tele ai ma faailoa LENEI, o Keriso o lo outou manuia lea.

Ua ta’u atu foi e Paulo ia Kalatia, o le Tala Lelei ese lenā ua outou faasaga i ai, ua ou fo’i mai ai; na ou ola a’e ai, ave a’u ma Faresaio, na ou tausia foi tulafono ma ou faafiafia i ta’ita’i Iutaia, sa silimusa foi lo’u fasiotia o Kerisiano, ma lo’u manatu maoaluma, o le ala sa’o lea e faaolaina ai. Peita’i, ua lē o lenā, ua fa’aali mai le Atua e ala i lona Agaga Paia, ma faailoa mai ia te a’u Iesu Keriso Toe Tu, o Ia o le Faaola i e faatuatua ma talitonu ia te Ia. O le faaolataga moni lea ua valaauina i ai a’u e le Agaga o le Atua, ua ou iloa ai, o le laasaga fou lea, ua ou maua Keriso, auā ua lē toe ola a’u, a o Keriso ua ola i totonu ia te a’u. O lea, ua lē o lenā, a o lenei ia Iesu Keriso, o le manuia moni i le Faaolataga, ua Ia saunia i lona Toe Tu manumalo mai le oti, o le manuia o le ola ua ia Keriso lea.

Ua manino upu a Paulo, E lē faaolaina outou i le tausī i le tulafono ma tu faa-Iutaia, e le o lenā, a o lenei, faaolaina outou ia Iesu Keriso, e pei ona a’oa’o muamua atu ai. E maua e outou lea Faaolataga i le faatuatua ma le talitonu ia Iesu Keriso. E le’i faigofie le faafitauli i Kalatia, auā ua sosolo faama’i lenei tala’iga, a’afia uma ai le au Kerisiano, ua faalautagitiagi le faatuatua ma pu’eia gofie e le tiapolo o satani ma ana au. E le’i faatafa le taologologo a le aposetolo i le alofa moni, ma ua lē toe fa’a’alo’aloa

foi upu, ae tuusa’o le finagalo o le Atua, ina ia lagona e Kalatia, ma lavea’iina mai le malaia. f9, “*Pei ona matou fai atu, ou te toe fai atu ai nei foi, afai e tala’iina atu e se isi ia te outou se tala lelei e ese i lea na outou talia, ia anatema ia*” Ua fai atu Paulo, Kalatia, afai e a’oa’o atu nisi ina ia liliu ese mai outou mai le Tala Lelei moni ia Keriso, ia fano lava. Malolosi upu a le Aposetolo ona o lona alofa, i ona tagata, ma tagata o le Alii, ma le au faatuatua. Filifili mo LENEI. Keriso lea. AE LE O LENĀ. A’oa’oga sesē. O OE LAVA O LE TAGATA VALEA, pe a e FILIFILI i LENĀ, ae lē o LENEI (Keriso lea). O se lu’itau malosi lea, e lu’i ai le faatuatua ina ia ‘aua le faaluafesasi le Ola ia Keriso, o le manuia lea. Lu’itau mo tatou le Ekalesia, tagata lotu, fanau a le Atua. IA TUMAU LE OLA IA KERISO.

E lē fesiligia le EFKS, ua soifua ma tatou ola ia Keriso. Ua tupu ma ola le Ekalesia i Samoa ma atunuu i fafo, ua eseese foi si’osi’omaga ua galulue ma atia’e ai, ae lē mala ese iina, mala ese iinei, o malamala lava o le laau e tasi, na tupuga mai i le Tala Lelei ia Iesu Keriso. O ā mai tatou filifiliga, mo Keriso, i faafitauli eseese, o lenei ma lenā, o loo fesoua’iina ai pea le soifua vala’auina i lea taimi ma lea vaitau? E tele anoanoa’i faafitauli, e faaluafesasi ai lo tatou vaa i Iesu, ae maise fili o le tiapolo e auala eseese mai. Sei tatou toe tepa lava i tua, i le Keriso na filifili ai Mālietua ma o tatou mātua ma tua’ā e talia le Tala Lelei, ina ia ola Samoa. Fai mai o le taeao lea na utu ai le toto masa’a, ma liua ai le fetaua’i ma le femisaa’i, ma maua le nofo filemu ma le nofo fealofani o Samoa. O le filifiliga na suia ai olaga pogisā o Samoa i le Malamalama o le Ola fou ia Keriso. Ua lafoa’i taua ma le fefulituaa’i, ae sapaia ma le fiafia le Tala Lelei ia Iesu. Ua lē o lenā [taua], a o lenei [filemu] ia Keriso.

O le fesili, O tumau pea lenā filifiliga manuia ma le lelei, sa faia e o tatou tua’ā i aso ua mavae? O tumau lenā filemu ma lenā lelei i nei aso, o tumau pea lo tatou filifilia o Keriso o le ola? O le upu moni, a faatusatusa aso la ma aso nei, ua i ai suiga, e i ai mea sa lelei, ua lē lelei, e i ai mea sa faalētonu, ua faaleleia i nei aso. Ua tatou feagai ma lu’itau o suiga i nei aso, suiga o le lalolagi talu le faama’i, e lē toe tau faailoaina. Suiga o le faiga malō o si tatou atunuu, ma mea ua tutupu, ua lē toe lilo lea. O suiga, ua lu’iina ai pea le soifua galue o le Ekalesia, i o tatou taimi, ina ia au, auau, ma fa’aauau faiva o Keriso mo le lumanai manuia o aiga, nuu ma le atunuu.

---

O lo tatou valaauina mo Keriso, o le tatou auau ese lea o mea ua tatou iloa e lē manuia ai le ola o le Ekalesia. O a ia mea? O le auau ese, o mea leaga, e ta'ita'i sesēina ai le tatou tausaili i le ola moni ia Keriso. Auau ese le faapolokiki, ua aafia ai le ola faakerisiano, e lē o le manuia o le tino, ae o le agaga ia faaolaina. Auau ese le tau faaaleaga ma le tau fa'asesē, auau ese le faafia poto ma le fa'afiaamiotonu, le fa'amaualuga ma le fa'asausili, auau ese le gagana matagā ma le faatupu vevesi, ma le anoanoa'i o isi mea lē lelei, ua tatou vaaia i nei aso, ua aafia ai tatou, tagata lotu o le EFKS, e ese le lē manaia, e matagā, e ta'umāmāina ai le suafa o Keriso, ma lana Tala Lelei. Pe lē o mea ia ua fai mai ai le Aposetolo o nuu ese, *o otaota mea nā, ia outou lafoa'i ia mea, e lē maua ai se ola manuia*. Le au uso e, e lē mafai ona tatou auauina mo Keriso ma fai LENĀ. Lafoa'i nei loa Lenā, ae fai Lenei ia Keriso, e manuia ai.

O le Ekalesia, o le galuega fa'aso'o o Iesu. O le fesili, o tumau pea le lelei o le galuega fa'aso'o i nei aso? Tele lu'itau o le galuega ma faaosoosoga. Lu'itau ai lo tatou faamaoni i tiute ma faiva eseese i lo tatou valaauina i a tatou filifiliga mo le manuia o lana Ekalesia. Ua tele so'o ua afaina le soifua valaauina, ona o a latou filifiliga, ua faasesēina e le tiapolo, ua tuu le Tala Lelei na a'oa'o ai Iesu, ae faasaga i le oti, tuinanau o le olaga, e fano ai. O la le aposetolo o Paulo, *“pe ana ou faafiafia pea i tagata, ua lē fai a'u ma auauina a Keriso.”* Ioe le au uso e, tasi lea fili o lo tatou valaauina, e lē o le faafiafia mai tagata ia ta'uleleia i tatou, ae o le ta'ita'i o le au Kerisiano ia ta'uleleia Keriso. O Lē na valaauina i tatou. O le fetalaiga a lo tatou Alii [Mareko 8 : 36], *“Auā se a le aogā i le tagata, pe afai na te maua le lalolagi uma, ae maumau ai lona ola?”*

Uso e ia Keriso, e lē o lenā, a o lenei ia Keriso, Le Faaola. Ia tatou mataala i fili ua fēsoua'iina ai le Ola o le Ekalesia i nei aso. Ia 'u'u mau Keriso i o ta lotu ma le faatuatua e lē maluelue. Ia viia ai le Atua. I le ma lenei, o loo lu'i lava le faigatā o lenei faama'i [koviti] i nisi o itutino o le Ekalesia. Ua tolu nei masina, o vaoia tapuaiga faitele i Aso Sā, ua faafalepuiiina le au Kerisiano i totonu o aiga, faasā le feoa'i ma le faia o ni mafutaga ma ni potopotoga, faafitauli ia o lo pagātia ai le au Kerisiano Niusauelese

i le taimi nei, ma nisi vaega o le EFKS i Ausetalia. O suiga, ua lu'iina ai pea le faatuatua ma le ola tapuai o tagata lotu. Ai lava o le finagalo fa'aali mai lea o le Atua, o le avanoa lea, e toe matimati ai le faatuatua i tapuaiga i totonu o aiga, o le autū lea o le Tala Lelei, ia ola manuia matua ma fanau, le lumanai o le Ekalesia. Ioe, e lē oge ala le Alii, i ala eseese o lenā ma lenei, e faailoa mai ai Lona finagalo mo le manuia o ona tagata faatuatua. Le Keriso Lenā, e lē tuulafoa'iina i tatou i Lona alofa tunoa.

Ioe le Ekalesia, o lu'itau o le ola ia Keriso, e tofotofoina i faigata ma puapuaga. E lu'itauina ai lo tatou la'a pea i luma, 'aua le faavaivai. O le Ekalesia ua tupu ma ola, e tāua le la'a i luma mai faigata. A la'a i luma le faatuatua, ia la'a foi i luma le soifua galue. Vaai i lenei ma lenā, o le vaai i luma i le manuia. Manuia e o faatasi ma Keriso, faatuatua. FILIFILI NEI I LENEI (Keriso lea), ae lē o LENĀ (tatou lotu). FILIFILI mo le ola, ae lē o le oti. FILIFILI mo le manuia, ae lē o le malaia. FILIFILI nei loa lenei, o KERISO lea, ae lē o lenā.

O Iosua lava ia, ina ua tagata matua na fai lana upu faufautua i le nuu. *Iosua 24:15 “Inā filifilia ia outou po o ai tou te auauina i ai...a'o a'u nei ma lo'u aiga, matou te auauina i le Alii.”*

O Keriso na FILIFILI i LENĀ (lona Tamā ma Lana faaolataga) ae lē o LENEI (lona lotu). IA FAILOU FINAGALO, ae lē o lo'u lotu. Tu'una lona lotu, ae fai le finagalo o le Tamā. Na Maliu i le satauro. FILIFILIGA ALOFA mo TATOU. Mo i TATOU, FILIFILI LENĀ (Keriso lea) ae lē o lenei (mea sesē). Ina ia fa'atumauiina ai le ola manuia o le EFKS. FILIFILI lenā, ae lē o lenei.

Ia manuia tele le folauga a le Ekalesia, i le fesoasoani mai o Lona Agaga. Ona o Iesu, Amene.

*Saunia:  
Uikilifi Vaifale FS,  
EFKS Rooty Hill,  
Pulega Sini Tutotomu,  
Matagaluega NIUSAUELESE I SISIFO,  
AUSEDALIA.*

---

**TALA O LE LOTU FAAFETAI EFKS LETUI**  
**PUNA’OA O LE TALA LELEI, 6 AOKUSO 2021**

---

*“Vivii atu ia outou i le Alii, auā e lelei o Ia, auā e faavavau lava Lona alofa. Ia faapea atu lava Isaraelu, e faavavau lava Lona alofa. Ia faapea atu lava le aiga o Arona, e faavavau lava Lona alofa. Ia faapea atu lava i latou o ē matata ’u i le Alii, e faavavau lava Lona alofa. Na ou valaau atu i le Alii i lo ’u puapuagā; na tali mai le Alii ia te a’u, ma na aumaia a’u i le mea lautele.”*

Ia viia Lona suafa paia, nei seia oo i le faavavau.

E muamua ona faatulou atu i lenei sauniga mamalu, lau susuga i le Ta’ita’i o le Sauniga, lau susuga i le Tamā Toeaina, susuga Tanielu Apineru FT faapea lou faletua; faatulou foi i le paia o le au faigaluega paia a le Atua, o susuga i faifeau ma outou faletua. Ae maise le paia o paolo ma gafa e tiu ai lenei nuu ma le Ekalesia, o suli ma feoi faapea lo tatou nuu atoa. O outou paia ma sa o le a lē oo i ai se leo, o paia ua taoto a o se ala o’o.

I le suafa manumalo o le Fa’ao o le Ekalesia, o Iesu Keriso, e fai lo’u leo faatauvaa ma sui o lenei Ekalesia e faatalofa ma ofo alofa atu. Malo le soifua manuia. Manatu ua maualuga lenei taeao ma le aso, i lo outou afifio ma susū mai. A e faafofoga ia i se Tala ootoo, ma le afuaga o lenei Lotu e pei ona silasila i ai i faasalalauga. **E tolu vaega tāua ua faatāuaina i lenei Sauniga:**

**1. O le agaga FAAFETAi i le Atua, ona o Lana Tala Lelei, na ala mai i le galuega faa misionare a le LMS, lea ua EFKS, e pei ona taia ai lenei lau’ele’ele, i le Tala mai le Lagi.**

E muamua ona faamālulū atu, ona o le sesē o loo aumai i le Faasalalauga (typing error). Mo le silafia, o le tausaga na oo mai ai le Lotu i Sasina faapea ma Letui i lenei itu i Savaii o le 1833. E tusa la i le faitauga, ua atoa nei le 188 tausaga talu ona sulua lenei aai i le malamalama o le Tala Lelei a Iesu Keriso. Peitai e le’i i ai se au faigaluega faifeau sa tausaga le galuega, auā sa tausavali tagata uma i Sapapalii, e a’oa’o ai tala o le Tusi Paia. A o le tausaga 1841, le uluai faifeau ma aloaia ai loa le faatūina o le Lotu i Letui. O le taeao nei la, ua atoa ai le 180 tausaga o le Tala Lelei i Letui nei.

**O le lisi o faifeau ma le aofaiga sa galulue mai le amataga e tau ati a’e le feau a le Atua:**

1. Panapa – Avao
2. Tuli – Patamea
3. Lemaveve – Sato’alepai
4. Uota – Lefagaoali’i
5. Penitila – lē māua le nuu
6. Tafanaiga – Matāvai
7. Ugapō – Safotu
8. Faraimo – Tutuila
9. Sulufa’i – Fagae’e
10. Neru – Tufutāfoe
11. Tarako – Lealatele
12. Fineaso – Lefagaoali’i
13. Liki – Paia
14. Manase – Lefagaoali’i
15. Aurelio – Fogātuli
16. Faraimo – Safotu
17. Tulasaga – Asaga
18. Suasua – Tanugamanono
19. Malo Tuala Tanielu & Ioka – Lefaga
- 20. Isaako Lafaele Sefo & Venit – Sapapalii (Faatūina le Lotu, faaigoaina ‘Puna’oa Fou o le Tala Lelei’).**

Ma e manatua ai i le agaga faafetai, nei auauna po o toa o le Tala Lelei, ua fultua mai, ona o le galuega sa fita i ai, ma asaina le gasū o aso o le po valea, afua ai ona tatou maua lenei taeao.

**O le lisi o Tama Fanau i alii ma tamaitai o Letui, sa valaauina e le Atua i Lana galuega tala’i, ma ē o loo i ai e oo mai i le taimi nei:**

**ALII**

1. Muavao Ieti & Puaaelo – Ekalesia Metotisi, Nuusuatia (ua tuumālō)
2. Alaiva – EFKS (ua leva ona tuumālō)
3. Ierupaala & 1<sup>st</sup> Mole, 2<sup>nd</sup> Muamai – EFKS Samauga 1963-66, EFKS Si’uniu 1977-91 penisione ai (tuumalo)
4. Ieru Fua Poutoa – o loo galue faamisionare i Papua i le taimi nei.
5. Amanaki Muavao & Maria – Ekalesia Metotisi (galue Faleula, Tausi Matagaluega Faleatiu)
6. Ageli Leumoana – Ekalesia Faapotopotoga a le Atua, Niu Sila.

---

## TAMAITAI

1. Peneueta & Lapana – Ekalesia Metotisi Fuailalo (tuumālō)
2. Tina & Ieru – Ekalesia Metotisi Avaio (tuumālō)
3. Tagivale & Taalolo Faamausili – Ekalesia Metotisi Matafa’a (tuumālō)
4. Eletise & Tamasii o Alani Tuitupou – Ekalesia Metotisi Toga, galulue Hawaii
5. Sinefu & Amosa Reupena – EFKS Vaimoso
6. Vika & Lotutamaiti – Ekalesia Metotisi (malolo)
7. Meauli & Siaosi – Ekalesia AOG Magiagi
8. Ioka & Konelio Tui – Faaiuso, Kolisi Faafaifeau Malua.

E lē o a’afia atu ai nisi o tama fanau mai isi Ekalesia, a e na o i latou sa lolotu i le EFKS Letui, ma fa’aaogaina i isi ituaiga. Tau ia ina ia galue pea le Agaga o le Atua, e musuia loto o fanau a lenei nuu, e fa’aaogā le ola mo le Atua.

A e lē itiiti le agaga e fia faafetaia tua’ā uma o lenei nuu, ua ta’o’oto mai i malae, o i latou na mua’i iloa le la o le amiotonu, ma silasila mamao i se manuia o le laueleele o ona fanua ma ona tagata. La latou galuega na afua ai ona te’a le po valea, a e aliali taeao o le malamalama. E ui ina ua i ai suiga i tupulaga i nei ona po, i se alafua lelei na faata’oto e tua’ā, auā se manuia o Letui nei ma taeao, a e ai lava o le a tupu ma ola le Tala Lelei. Tofafā ia ma le filemu i o outou oliolisaga tumau, ma faafofoga mai le Lagi o outou agaga, ua faafetaia lo outou fīta i tuga, ua atoa nei le 180 tausaga, na outou talia ai le Tala ia Iesu Keriso. Tofaina soifua, e manatua pea lo outou ta’uaogāina i le Atua ma Lana galuega.

**2. O le loto faafetai, i le paia o aiga e lua, e ona fanua nei, o loo tutū ai fale o le Ekalesia ma ana meatotino uma, ina ua tuu malie mai fanua, e ala i le faapepa, ma faatulafonoina o ni meatotino a le Ekalesia, e aunoa ma se toe aiāina.**

Mo le silafia, o nei fanua e faapea na mua’i tu loa le Lotu i Letui, ona foa’i loa lea, a e na o le kuata eka, e faatū ai le Falesa muamua o le fale afolau, ma le fale o le faifeau. Sau a’i ona malilie lea o le aiga o Sa Afitū, e faatū le Falesa i lo latou fanua. Peitai na toe ofo faalua e le toeaina e suaia ia Fua Poutoa, le

faaopoopoga o le fanua lea e tu ai nei le Falesa tuai, lea ua fai ma fale talaloa (hall), a e na ofo e Faasoa Siliga o suli lava o Tina Masoe, le vaega lea e i ai nei le Falesa fou, O le Puna’oa o le Tala Lelei. Ma o le igoa o le fanua o Faletui.

O le fanua o Kafola a le aiga o Faatoatoa Taalili ma Faranise, lea ua sosoo atu i ai le fale o le faifeau, i le finagalo malilie o le afioga ia Togoi’u Ageli ma le Tina matua ia Tima Lavea, ma ona suli uma. Mo le silafia, o lea ua taulimaina nei e le susuga i le Toeaina, faamaoniga o nei pepa, ua tuumalie mai ai Fanua mo le EFKS Letui. O le agaga faafetai, ona o le foai e ala i fanua, o measina a aiga, o le faasinomaga o le ola, a ua faamatu’u mo le Atua ma lana feau. O mea ua e kopano mo le Atua, ma e lē se mea faalēaogā lo outou tautiga i le Atua ma lana feau. Ia faamanuia tele le Atua i le paia o outou aiga i ona suli uma. Ia fai pea ma viiga o le Atua la outou foai.

**3. Ua mae’a, le ōloōloia ma le afusisina, afutoto, e ala i le Aitalafu e pei ona sa i ai le \$200,000 na nonōina mai le NPF, auā le faamae’aina o le fale o le Atua, le ‘Puna’oa o le Tala Lelei’. Ma o le totogiina lenei o lea Aitalafu:**

1. O le Tupe na totogiina a e ma te le’i taunuu mai i le aso 15 Aperila 2016 - **\$16,638.40**
2. O le Tupe na totogi ina ua uma le Umusaga Malumalu, 29 Tesema 2017 - **\$25,000.00**
3. O le Ekalesia i ona Matafale lotu e 32, i Tausala, Bingo, Atina’e - **\$83,409**
4. Autalavou to’aitiiti - **\$10,000**
5. Laupapa Faatau a le Ekalesia e ala i le feasoasoani a Faasoa Sone ma le kamupani ‘ili laupapa - **\$30,000**
6. Leota Vao & Taua (Apia, Lefaga) - **\$4,000**
7. Mafutaga Tuai i Sini Ausetalia, taitaiga Aiga Sa Fiū - **\$24,400**
8. Papalii Laupepa & Faletua & Nofo-a-alo i Manu’a - **\$5,000**
9. Afitu Neueli & Nuutai & Nofo-a-alo – Rev. Alani & Eletise Tuitupou (Hawaii), Falenuu Brown (Amerika), Afitu Lui & Rasela (Tutuila, Samoa), Wanda & To’alua (Amerika), Tupai Lafoga, Taatiti Isaia, Anina (Tutuila), faapea le aiga atoa - **\$14,000**. Sa ofoina foi laau o le fanua sa ta ai le laau e tusa lona tau ma le \$10,000.
10. Mafutaga Sini Ausetalia – Taitaifono: Togoi’u Ageli & Sara & Fanau, Failautusi: Tupai Tapaau & Faasoa Vaeluaga & Fanau, Sui Auai: Faatoatoa Venu

& Faletua & Fanau, Savea Leaoa & Faletua & Fanau, Taunese Afitu Neueli & Fanau - **\$42,700**

11. Hon. Laaulialemalietoa Leauatea & Faletua - **\$5,000**

12. Tupai Tapaau, Faasoa Vaeluaga, Savea Leaoa, Taunese (Sini, Ausetalia) - **\$3,000**

13. Masutele Sau & To'alua & Fanau, Muai Puni & Tausi & Fanau, Falanise Afitu Tino & Fanau (Niu Sila) - **\$6,700**

14. Fua Iafeta & Faatupu & Fanau & Paiaaau Afioga & Fanau (Niu Sila) - **\$4,500**

15. Faasoa Lalotoga & Samoa & Fanau, Laupepa Fua Tasi, Faatupu Fua Tasi (Niu Sila) - **\$1,200**

16. Susana Harmon Faatoafe (Tutuila) - **\$2,000**

17. Nui Ah Fook & To'alua & Fanau (Ausetalia) - **\$2,000**

18. Seira Mulipola & Fanau (Niu Sila) - **\$2,000**

19. Timani Sufia Taalolo & To'alua & Fanau (Niu Sila) - **\$3,000**

20. Masu Sarai & Saena & Fanau i Manu'a, Salome, Miriama, Tapalega ma le Aiga sa totogi faaumaina le Aitalafu - **\$3,375.90**

Mo le silafia, o le aofaiga atoa o le tupe sa totogi e **\$284,923.30**. Mai le \$200,000 sa nonō mai, e **\$84,923.30** le aofai o le Tului sa totogiina. E tusa ma faamaumauga, o le tausaga e 2015 sa faia ai lenei nonōgatupe, i le faamalumalu a le EFKS Aoa. Ma e tusa ma le 7 tausaga lea sa totogiina ma ua mae'a ai lenei aitalafu.

Ile vaiaso nei, sa toe to'ia ai foi le Laulau a le Ekalesia i le agalelei o le aiga o Sa Fiū i Ausetalia, le aiga atoa o loo i ai e pei ona ta'ita'iina e le fetalaiaga ia Fiu Sevaio ma isi, sa latou totogiina faamae'a le Toomaga i le Ekalesia Aoa o **\$24,856.04**. Ma ua mamā ai foi le Toomaga i le taimi nei.

Ua leai ni upu e mafai ai ona faamatala le agaga o le fiafia ma le faafetai, ona o le fa'aalia o le soifua lotonuu moni, o le Isaraelu lava ua susu'e le faamalama ma tilotilo mai, ma manatua se tapuaiga a o se nofo tatalo a nai o latou matua, ae maise le laueleele na fofoa ma a'oa'o ai i le Tala Lelei a le Atua, le afuaga lea o le Lotu Faafetai i lenei taeao. O le tatalo ua silafia e le Atua, lo outou tautigā ona o la ma Lana feau. Ia alofa le Atua ma saga faamanuia atu. O upu lava o le Tusi, *E sili lava le manuia o lē foa'i, nai lo lē na te talia*, ma e tupu mea aveva, a e lē tupu mea e teu pea. E lē se mea faalēaogā foi, lo outou tautigā i le Atua ma Lana feau. Ia fai pea ma viiga o le Atua, lau foa'i ma lou agalelei e ala i lau tautua.

E lē galo le tapuaiga mau i le soifua afulelea a outou le au matutua, na po ai le fala ma feula le mulilā, ma tatalo lē leoa auā se manuia o le Atua ma Lana galuega. Afioga Afitu Neueli & Nuutai, le tina matua ia Fualalo, afioga Masu Lafovale & Tatala, Muavao Uesile & Sei, Sufia Metusela, Fetuiai Liaga.

E lē itiiti le faafetai i lau susuga i le Toeaina, faafetai tima'i, faafetai faufautua, ma lau faamalosi'au, ae maise i taimi na maua ai i ma'i tuga o le ola, i lau tatalo ma lau faamafanafanaga. Mo le silafia, o le aso 20 Iulai, a e ou te le'i ulu i totonu o le NPF e totogi faauma le aitalafu, ae faa-faasaga e le Atua o'u mata i le mea o tu mai ai le susuga i le Toeaina, afuaga na o le valaau fa'aaloalo e ta'ita'i lenei Sauniga Faafetai, auā ua tatau ma onomea o le Tamā o le Pulega.

**E faai'u ai se faamatalaga, ua faavae ai ma le Lotu Faamanatu a Letui, i le aso e atoa ai le 180 tausaga o le Tala Lelei i ona elele ma ona tagata. Ma o le aso 20 Iulai o tausaga taitasi, o le a fai lea ma aso o le Lotu Faamanatu. Ua fa'aigoaina – “Puna'oa Fou o le Tala Lelei”.**

Ia outou susuga i A'oa'o Fesoasoani, afioga Tiakono, Matafale matai o le Ekalesia, i le Mafutaga Tina, Aulavou, le Aoga Aso Sa ma le Aufaipese, o pisinisi eseese i totonu o lo tatou nuu, faapea lo tatou nuu. Alo ma fanau uma ma soo se toto Letui i itu e fia o le kelope. Le afifio o le paia o aiga, le mamalu o le nofo ituaiga ia Fatua ma Falelupe, faapea le fetalaiaga a Fiu, malo le Onosai ma le faatoatoa, malo le lava papale. Faafetai tautua, tou te faia mea sili ma outou manumalo ai lava.

Ua e masani i le upu o le tautua. O le faaiuga o ni mea lelei, o le amataga foi lena o isi galuega e silisili atu ona lelei. Alo laia i lau faiga taulaga i lenei tausaga, fai ma le loto malie ma ofo mea silisili i le Atua. O le a foi se tala a le auauna faatauvaa, magalo se leo ua lē tautamalii i se faafofoga'aga. Alofa le Atua, pe a tuuama le fua ma taape leni aofia, ia i ai faamanuiaga a le Atua. Manuia lau susuga a le ta'ita'i faapea le paia o le sauniga. Tumau i le Atua le viiga, nei seia oo i le faavavau.

Soifua ma ia manuia. Faafetai.

*Saunia: Isaako Lafaele Sefo FS.*

*EFKS Letui,*

*Pulega Gagaifomauga,*

*Matagaluega ITU O TANE.*

---

# O LE PEROFETA MULIMULI

(O se tala faa-fagogo faaliliuina mai le Tusi, 'The Last Oracle' tusia e James Rollins)

*I le aai o Uosigitone, o loo maliu ai se tamaloa e leai se 'āiga, na lavea i le pulufana a se fasioti tagata, i lima o le ta'ita'i'au o Karai Peresa. Peita'i o lea maliu o loo ia tu'ua ai se misiterio e sili atu ona ogaoga ma telē: o se tupe siliva e pisipisia i le toto, na maua o loo 'u'u mau i le lima o le tamaloa ua maliu, o se tupe tuai mai tupulaga ua leva, e mafai ona tala lona gafa i le perofeta fai folafolaga i Eleni o Talefaia. A o saili le toatele o tagata mo lenei tupe na gaoia, na iloa e Karai Peresa o lenei tupe siliva o le ki lea e tatala ai le faatofalaiga na faia i le Taua Mālūlū, ma o se taufaafefe tele i le faavae papa o le fanau a tagata i le lalolagi atoa. O se tanetau o saienisi o mafaufauga faavāomalo e ta'ua o le 'au Iasoni, ua latou mauaina se auala e inisinia ai tamaiti e ma'ale'ale ma'ema'eā mafaufau, latou te fa'aalia taleni faapitoa - o le atamai maoa'e i matematika, o le pulea faatonutonu faalemafaufau o faamatalaga, e talenia i atamai faapitoa o le sogasogā - ina ia maua mai ai se isi mea e sili atu ona maoa'e ma mata'utia lona taufaafefe, i le faamoemoe e fausia ai se tagata fai folafolaga o le lalolagi mo le meleniuma fou, o se tasi e mafai ona puleaina faatogafiti, ina ia fausia ai se soifuaga fou o le filemu mo le lalolagi atoa...o se filemu i ona lava aiaiga ma tu'utu'uga.*

*O le faataali'o i le isi itu o le kelope, o loo ala a'e ai se isi tamaloa i le moega o le falema'i, ua leai sona toe manatua po o ai ia, na o lona iloa o ia o se pagotā i se fale su'esu'e i lalo o le eleele. I le fesoasoani a ni tamaiti tulaga'ese se toatolu, na ia mafai ai ona fai le sola'aga i le vaomatua ma se laufanua e uilā, a o tuliloa e tagata fe'ai na faafailele mai i le fale su'esu'e lava lea e tasi. Peitai o lona faamoemoe e lē o le sola ese, e lē ina ia ola foi. Ae ina ia solipala se taupulepulega e tafia ese ai le kuata o le faitau aofa'i o le lalolagi, e tatau ai ona ia faalēaogāina mea uma e faa-ositaulaga, e oo lava i tamaiti na latou lavea'iina o ia.*

## Mataupu I

Tausaga TA 398.

Mauga o Paranasu, Eleni.

Ua latou o mai e seleia o ia. Na tu mai le tamaitai i le faapaologa o le malumalu. Na gatete o ia i totonu o lona ofu manifinifi, na o sina ie lanu pa'epa'e o fusi i lona sulugatiti, ae lē o le mālūlū 'a'ati o le taeao segisegi na aisā ai ona ponaivi. I lalo ifo, o loo gasolosolo a'e ai le solo o sulu i auvae mauga o Paranasu, e pei o se vaitafe o afi. O loo mulimuli atu i le auala e fausia i ma'a o le Ala Paia, e a'e ma fefo'ifo'ia'i solo aga'i i luga i le malumalu o Apolo. O le pa'ō mai o pelu e taia i talitā, o loo fua i ai le savaliga, o se aofaiga atoa e tusa ma le lekeono a Roma e lima selau. O le auala e ui faapi'opi'o atu i maa faamanatu ta'eta'ei ma oloa ua leva ona faatafunu'iina. O a lava mea e mafai ona susunu e le'i faasaoina.

A o sivasiva a'e le solo afi i totonu o faatafunu, na lafoia e aloiafi ni ataata suluia o vaitaimi tau feoloolo, o se toe faafoisia mumū o le mamalu sa i ai muamua: o tamaoiga taumasuasua o auro ma penina, o faaputuga o faatagata ma maa faamanatu sa togitogi ma fausia e tufuga aupito atamamai, o faapotopotoga o motu o tagata na lolofi mai e faalogo i valoaga ma upu a le Perofeta. A e leai se isi mea.

I le senituri ua tuana'i, na tuuina ifo ai maualalo Talefaia e osofaiga a tagata Kaulo, o tagata faasāolo o Terasiano, ae silisili ai ona ua tuulafoa'iina. Ua toaititi tagata ua o mai e saili se valo'aga ma se upu mai le perofeta: o se fai lafu'oti e fesiligia le faamaoni o lana avā, o se seila e saili mo se upu faamanuia i lana folauga i le Ava o Korinito.

O le i'uga o taimi, ua oo mai le i'uga o le perofeta o Talefaia. O le mae'a ai o le tolu sefulu tausaga o perofeta atu, o ia le perofeta mulimuli e tau'aveina le suafa Paiatea. O le Perofeta mulimuli o Talefaia. Peitai o lenei avega e aumai ai ma le lu'itau mulimuli. Ua liliu Paiatea faasaga i le itu i sasa'e, i le lagi ua amata ona pupula. Le rosa o Eosi, le atua tamaitai o le vaveao, na te faatopetopea Apolo e faagutu ana solofanua e fa mo lana kariota. O se tasi uso o Paiatea, o se tali misisā talavou, na laa ane mai ona tua. "Lo'u matai e, tatou o ese ma matou," na augani ane ai le tama'ita'i. "E le'i tuai, o loo lava le taimi. E mafai ona tatou sosola uma ma isi i ana maualuluga." Na pa'i atu le lima o Paiatea e faamafanafana i luga o le tau'au o le fafine. O le po ua te'a, na sosola ai isi fafine i mea maualuluga gaoā i le mea o i ai ana o Tionisusa e saogalemū ai. A o Paiatea, e i ai lona tiute mulimuli e fai iinei.



---

“Lo’u matai, e lē lava se taimi e fai ai lenei perofetaga mulimuli.”

“E tatau ia te a’u ona faataunuu.”

“Ia fai loa nei. A e le’i tuai.”

Na liliu ese Paiatea. “E tatau ona tatou faatali i le vaveao o le aso lona fitu. O la tatou tu ma le aga lena.”

A o goto ifo le la ananafi, na amata loa ona tapenapena Paiatea. Na ia ta’ele i le vai siliva o Kasetilia, inu mai le isi vai o Kasoti, ma susunu lau laau i luga o le fata faitaulaga lanu uliuli i fafo o le malumalu. Na ia mulimulita’i i le faasologa tonu o tapenaga e ao ona faia, e pei ona sa faia e le ulua’i Paiatea i le faitau afe ma afe o tausaga talu ai.

Pau lava o lea, o le taimi nei, ua lē toatasi na o le Perofeta i ana tapenaga i le tu o lona faamamāina. Sa i ai i lona autafa se teineitiiti, e le’i atoa lona sefululua tausaga. Si nei ‘alu’alu toto ma lenei faiga tulaga ‘ese. Sa na o le tu telenoa lava o lenei teineitiiti i totonu o le vai ta’ele, a o faamamā ma u’u o ia e isi fafine matutua. E leai se upu na ia tautala ai, na o le tu lava ma faaloaloa atu lona lima, e tatala ma tapuni ona tamatama’ilima, e peisea’i o loo fia tago atu i se mea na o ia e mafai ona vaaia. O ai se atua na te faatigaina se tamaitiiti, ae na te toe faamanuiaina foi? O le upu moni e oo ia Apolo na te lē faia. Peitai o upu na tautala ai lenei teineitiiti i le tolusefulu aso talu ai, o ni upu e na o se atua e aumai ai. O upu ua na tutu, tapili ma faatalalī le afi mumū lea ua a’e aga’i mai i Talefaia. Ma’imau e, pe ana ‘aua le aumaia le teineitiiti iinei.

Sa malie lava Paiatea e tuu Talefaia ina ia mou atu seia oo ina leiloa. Na te manatua upu na fai e se tasi o e na muamua atu ia te ia, ua leva ona maliu faitau seneturi, o se fa’aaliga mamala.

Na fesili le Emeperoa o Aokuso i lona tuafafine, “Aiseā ua aga’i ai ina gūgū le Perofeta?”

Na tali lona tuafafine, “O se tamaitiiti Eperu, o se atua e pule i tagata ua faamanuiaina, ua na fai mai ia te a’u ou te tu’ua le fale nei...”

O nei upu ua faamaonia o se perofetaga e moni ma sa’o. O le faatuatuga o le Keriso na tupu a’e ma ufitia le malo ma faaumatia soo se faamoemoe mo le toe faafoi i aso ua mavae.

Ona oo lea i le masina talu ai, ua auina mai le teineitiiti tulaga ese i lona faitoto’a.

Na tepa ese Paiatea mai le afi ae faasaga atu i le ogatotonugalemū, o le lotoifale o le malumalu o Apolo. O loo faatali mai le teineitiiti i totonu.

O ia o se teineitiiti sa tausia mai le aai mamao o Kiose. I le faasolo mai o seneturi ua mavae, e toatele na latou la’u ane tamaiti faapea i lea nofoaga, ma lafoa’i atu ai le avega e tau’ave e le mafutaga a tina o i ai. O le toatele o i latou na te’ena ma toe auina ese. Na o teineitiiti lava e sili ona talafeagai sa faataga ona talia: e sa’onoa le fuatino, e manino mata ma e lē soona tu’ufauina. E lē mafai ona talia e Apolo se tasi e itiiti ifo ona lelei nai lo nei, mo lona agaga faaperofeta.

O le mea lea, ina ua auina mai lenei teineitiiti e lē lavalavā ma tuu i fasitepu o le malumalu o Apolo, e le’i ano ane lava i ai Paiatea e vaai i ai. O le teineitiiti e lē aulelei, o lona lauulu uliuli sa faapona ma lavelave solo, o lona pa’u sa iloga ai mā’ila’ila. Peitai o tua atu i totonu, na ‘i’ite e Paiatea e i ai se mea e sesē i le teineitiiti. O le auala o loo faalue ai. E oo i ona mata e sioa aunoa ma le vaai tonu i se mea.

O le mau a ana lagolago na aumaia o ia, e faapea o le teine na pa’i i ai atua. E mafai ona ia faitauina le aofa’i o fua o le olive i luga o le laau, i le nā o se tepa tasi lava i ai, e mafai ona ia iloa le aso e fanau ai le mamoe fafine i le nā o le pa’i atu i ai o lona lima i ona luga.

Ina ua faalogo Paiatea i nei faamatalaga, na lagalagā lona fia iloa. Na ia valaau ai i le teine ina ia la’ua feiloa’i i le faitoto’a o le malumalu. Na usitai le teine, peitai sa minoi o ia e pei o se mea ua momotu ese, e peisea’i ua feula ma faataavili o ia i luga e le matagi. Sa taumafai Paiatea e taofi mai o ia i lona lima ina ia mafai ona nofo ifo i le fasitepu pito i luga.

“E mafai ona e ta’u maia lou igoa?” na ia fesili atu ai i le teineitiiti pa’e’e.

“O lona igoa o Anatea,” na valaau mai ai le isi lagolago mai lalo.

Na pulato’a le vaai a Paiatea i le teineitiiti. “Anatea, e te iloa le mafua’aga na aumai ai oe iinei?”

“E gaogao lou fale,” o le memumemu lea a le teine i le fola o le fale, mulimuli ane. O le mea sili lea e mafai ona tautala. Na tepa atu Paiatea i totonu o le fale. Na mumū le magalafu i le ogatotonu o le potu tele autū o le maota. E moni o loo gaogao ma tuufua le maota i le taimi nei, peitai o upu a le teineitiiti e peisea’i o loo musumusu atu i se isi mea e sili atu.

Atonu po o lana amio. E ese, e mamao, e pei o loo tu le tasi ona vae i le lalolagi lenei, ae o le isi vae i se isi paneta ese. Ua tepa a’e le teineitiiti i ona mata manino lanu moana, e tumu i le agaga mamā, e matuā tuu faafeagai ma isi upu na masa’a mai ona laugutu. “Ua e loomatua. Ua toe itiiti ona e oti lea.”

---

## **O LE PEROFETA MULIMULI**

O lalo ifo, ua taumafai a'e ai lona lagolago e otegia o ia, peitai na taumafai pea Paiatea e faalēmū lona leo ma ana upu. "Tatou te feoti uma lava, Anatea. O le faasologa masani lena o le lalolagi lenei."

Na lūlū le ulu o le teine. "E lē faapēnā le tama Eperu." O ona mata foliga ese ua tauau ina fai ma faafiufiu ia Paiatea. O mone ma fulufulu i lima o Paiatea na gatete uma. E manino mai o le teineitiiti lenei na a'oa'oina lelei i le aganuu ma le talitonuga o le Keriso ma lona satauro lavatoto. A o ana upu lava foi. O se i'uleo tulaga ese le mata'utia.

Le tama Eperu... Na faamanatu mai ai ia te ia le valo'aga a ona mātua faasino i le faafanoga.

"Peitai e i ai le isi o le a sau," o le fa'auau lea a le teine. "O le isi foi tama."

"Le isi tama?" Na sōsō ma faalagolago atu teisi Paiatea. "O ai? E mai fea?"

"E mai a'u miti." Na ololo le tasi mulilima o le teine i lona taliga.

O le manatu o Paiatea o loo tele ni mea loloto o i lenei teine e le'i lagaina mai, na ala ai ona ia vanevane atili. "O le tama lea?" na ia fesili atu. "O ai lena tama?"

O upu e soso'o na tautala mai ai le teineitiiti, na mafua ai ona faalogoina le mānavanava mapuea faate'ia mai le aofia na potopoto - o i latou uma e iloa gofie le upu vale ma upu leaga pe a faalogo ai.

"O ia o le uso o le tama Eperu." Ona 'u'u mau lea e le teineitiiti o le pito ofu o Paiatea. "E mu i a'u miti, ma o le a ia faamūina mea uma. E leai se mea e totoe. E oo lava ia Roma."

Mo le masina ua te'a, sa taumafai ai Paiatea e silafia atili lenei mala, e oo lava i le aveina o le teineitiiti i totonu o le lotoā a le mafutaga a tina. Peitai sa na o le pei e tuumuli o ia, ua matuā gūgū. Ui i lea, sa i ai le auala e tasi e iloa atili ai.

Afai e moni lava ua faamanuiaina le teine, o le paoa o le mānava a Apolo - lana ausa faaperofeta - e ono susunuina faasa'oloto le mea o loo loka i totonu o le uiga ese o le teineitiiti. Ae faamata e lava le taimi?

O le pa'i ane i lona tau'au na faalavelaveina lona mafaufau mamao ese ma toe aumaia o ia i le taimi nei. "Lo'u matai, o le la..." na tauanau ane ai lona uso laititi. Na tulimata'i e Paiatea le itu i sasa'e. Na sulua malosi mai le lagi i sasa'e, e faailo mai le oso a'e o le la i le vaveao. O lalo ifo, sa lagonaina atu ai le fe'ei mai o le au lekeono a Roma. O le sāvali mai le nofoalii mamalu ua faamalosi mai e auina atu le teineitiiti i Roma, ua folafolaina o loo ulufia e temoni.

Sa musu Paiatea. Na auina atu e atua le teineitiiti lenei i lona fale, i le malumalu o Apolo. E le'i mafai e Paiatea ona tuuina atu le teine, ae na te le'i tofotofoina o ia, i le tuuina i ai o le fesili.

I le itu i sasa'e, na amata ona aliali a'e 'ave o le la i le lagi o le taeao. Ua oso a'e malama o le aso lona fitu o le masina lona fitu. Ua leva ona latou faatali. Na u le tua o Paiatea i le lekeono afi mumū. "O mai. E tatau ona tatou faanatinati." Na ia vevesi atu i le ogatotonu o le malumalu. Na faafetaia'i foi e aloiafi iinei, ae ua na o ni mea mafanafana e faafeiloa'i mai le mugalafu paia o le malumalu. Sa faasaga pea nisi ona uso matutua e to'alua i le vaaiga o le afi, ua matutua tele e lē gafatia le a'e i luga i le mea o i ai ana. Na ia luelue lona ulu auaua'i ia i la'ua, ona faanatinati ese ai lea i autafa o le mugalafu.

I tua o le malumalu, sa i ai se auala sitepu e tau ifo i le potu paia tuma'oti. E na o i latou sa auuina i le Perofeta e faatagaina ona latou ulufale i le potu lea aupito tutotonu i lalo o le eleele. A o ia faaifofo, o fausaga i le maamora na faasolo atu i papa'amu mata. Na faai'u le ala faa-fasitepu i se ana itiiti. O lea ana sa mauaina i auga tupulaga ua mavae e se fai lafu'oti, ina ua latalata ane i le gutu o le ana, na taia i le 'ave o ausa manogi suamalie a Apolo, ma lolo atu ai i vaaiga uiga ese. Pe ana toe maua mai ia meaalofo mo sina toe lāoso se tasi!

Na maua atu e Paiatea le teineitiiti o faatali mai i totonu o le ana. Sa ofu o ia i se ofu talaloa e lāpo'a tele mo ia, a o nofo faanape-vae i autafa o le tafatolu apa memea sa lagolagoina le ma'a paia, o se papa lapotopoto e maualuga tau i le sulugatititi, o le faailoga vaaia o le ogatotonugalemū o le lalolagi, le aupito tutototnu o le univesa. Na o le pau le isi teuteu i totonu o le ana, o se nofoa siitia maualuga mo se toatasi, o loo taatia i luga o le tafatolu. Sa tu i luga tonu o se ta'e i le fola. O Paiatea, ua leva ona masani i le ausa o Apolo, o loo taia pea o ia i le nanamu na alu a'e mai lalo, o le manogi o fuga o le sekati.

O le nanamu o le atua, o lana mānava faa-perofeta. "Ua oo mai le taimi," na ia fai atu ai i lona uso laititi, sa mulimuli mai ia te ia. "Aumai le teine ia te a'u."

Na kolosi atu Paiatea i le tafatolu ma ti'eti'e i le nofoa. A o faatulaga o ia i luga tonu o le ta'e o le fola, na alu a'e le ausa ma faata'ele o ia i le mānava o Apolo. "Faavave!"

Na afisi e le uso laititi le teineitiiti ma tu'u atu i luga o vae o Paiatea. Sa faaluelue lemū e Paiatea le teineitiiti, e pei ona fai e se tina i lana pepe, peitai e le'i tali ane i ai le teineitiiti i nei aga tau faafiafia. Ua

---

uma ona lagona e Paiatea a'afiaga o le 'ea na mapuna a'e mai le eleele i ona lalo ifo. O se faalogoga e pei se mā'ini'ini e masani ai ua toe faalogoina i ona lima ma ona vae. Na ia lagona le mū mafanafana o lona fa'a'ā i a o ulufia atu Apolo i totonu ia te ia. Na amata ona punitia lana vaai. A e o le teine e laititi, e sili atu ona a'afia gofie i le 'ea. Na faapa'ū i tua le ulu o le teine; ma ona laumata ua pa'u'ū ifo i lalo. O le upu moni na te lē gafataulimaina ona faatautū atu mo se taimi umi i le malosi o le ulufia o ia e Apolo. Ui i lea, afai e i ai se faamoemoe o totoe, e tataua ona fesiligia le teine.

“Suga,” na 'e'ē atu ai Paiatea, “ta'u mai nisi tala e uiga i le tama ma le mala na ia ta'u atu ia te oe. O fea o le a tula'i mai ai o ia?” Na memumemu mālie tama'i laugutu laiti i se musumusū. “E mai ia te a'u. E mai i a'u miti.” Na maua e ona tamatama'i lima le lima o Paiatea ma oomi mau. Na fa'auau le masa'a mai o isi upu mai lona gutu. “Ua gaogao lou fale...ua mātūtū ou vaipuna. Peitai o le a tafe mai se vaipuna fou o perofetaga.”

Ua atili ai le mau o le taofi o lima o Paiatea i le fusiga o le teine. Ua umi se taimi o faamalumu ifo le faatafunaga i luga o le malumu. “Se vaipuna fou.” Sa tatagi le i'uleo o le faamoemoe i lona leo. “I iinei i Talefaia?”

“Leai...”

Na faatopetope le mānava a Paiatea. “A o fea la o le a tula'i a'e ai o ia?”

Na minoi laugutu o le teine, a e leai se upu na sau ai. Na lūlū e Paiatea le teineitiiti. “O fea?”

Na si'i a'e e le teine lona lima gāpelupelu ma faataatia i luga o lona lava manava. Mai lena pa'i, na mapuna a'e ai se vaaiga i totonu o Paiatea, i ni vai siliva o pupuna a'e mai le pute o le teine, e mai totonu o lona manava. O se vaipuna fou. Peita'i o se vaaiga lea sa sau mai ia Apolo? Po o se mea na fanau mai i lona lava faamoemoe?

Na tuia lana faataupupula e se tauvalaau 'e'ē. O ni leo malolosi ma leotele na lagonaina atu mai lalo. Na iloa atu se tagata o tau pa'ū mai i fasitepu. O se tasi o le au matutua na latou vaaia le afi. O loo taofi ma oomi le tasi o ona lima i lona tau'au. Sa tafe mai se sua lanu mūmū mai lona alofilima. Ma le ulu lanu uliuli o se ū o loo lālā mai ai i le va o ona tamatama'ilima.

“Ua tuai tele,” na valaau mai ai le loomatua ma solovī ifo i ona tulivae. “O Roma...”

Na lagona e Paiatea upu a le loomatua, peita'i sa tumau lona silaloa i totonu o le ausa. O tua atu o ona

mata, na ia vaaia ai le puna o tafe mai le teineitiiti, o se ituaiga fou o le paoa faaperofeta. Peitai na sogitia foi e Paiatea le manogi o le afi mai sulu a tagata Roma. Na masa'a atu le asu ma le toto i totonu o le fa'aaliga na ia vaaia. Ua tafe atu nei le vaipuna siliva faatasi ma se pisipisia lanu mūmū uliuli ma fafati atu i le lumana'i.

Na faafuase'i le taatia galemulemu o le teine i totonu o ona lima, ua matuā pulea atoa e le ausa o le savili. A o maitauina pea e Paiatea le fa'aaliga, na ia vaaia le ausa pāuli o fausia mai ai se faatagata uliuli... o le ataata o se tamaitiiti. Na mūmū a'e ai o afi mai ona tua atu. Na toe taia i lana faalogo upu a le teineitiiti na fai mai i le masina talu ai. Le uso o le tama Eperu... lē o le a ia tutu le afi i le lalolagi.

Na taofi mau e Paiatea le teine ua galemu. O upu faaperofeta a le teine na faa-ataata tutusa mai ai le malaia faapea foi le faaolataga.

Mata e sili ia ona taatia atu o ia i le lekeono tautupu, ina ia faamuta ai loa iinei le lumana'i lē mautinoa. Mai luga a'e, na lagonaina atu ai i'uleo malolosi ma sauā. Ua leai lava se toe sola ese. Se'i vaganā le oti. Sa faateteleina pea le fa'aaliga i totonu o ia. Na auina atu e Apolo le teineitiiti. Na auina atu ia Paiatea. O le a tafe se vaipuna fou. Na tō lana mānava tele i totonu, ma na ia folo atoa atu ai Apolo i totonu ia te ia....

O le ā le mea e tataua ona ou faia? Na savali atu le ta'ita'i'au Roma i le potu talaloa. Ua uma ona avatu ia te ia lona faatonuga - ia seleia le teine na tautala i le faaumatia o le malo. O anapō na latou pu'eina ai se tasi o auauina o le malumu, o se tamaiti'i. Ina ua sasa o ia - a e le'i tuuina atu mulimuli o ia i lana vaega'au - sa ia ta'u ane ai o le teineitiiti o loo i ai i totonu o le malumu.

“Aumai sulu!” na ia tauvalaau atu ai. “Su'e faatapito tulimanu uma!”

Sa tata'i atu ona mata i se mea na minoi mai autafa i tua o le malumu - tata'i atu ai ma lana pelu. Na aliali ane i luga se fafine mai le ataata o se fasitepu i lalo ifo. Na ia tau pa'ū mai i luma, na iloa atu lona la'ala'a mai fasitepu e lua, o tau maluelue ma e pei o loo niniva. Na la'ei i ie papa'e, ma sa faapaleina i le pale laulaau. Na iloa e le ta'ita'i'au le tagata lea o loo tu mai i ona luma. O le Perofeta o Talefaia.

Na taumafai le ta'ita'i'au e tete'e atu lona gatete i le fefe. E pei o le toatele o isi fitafita, sa ia mulimuli pea ma faatino faalilolilo, o talitonuga ma tapuaiga anamua. Na oo lava i le seleia o povi po'a pa'ia o Mitara ma ta'ele ai i lo latou toto.

---

## O LE PEROFETA MULIMULI

Ui i lea, o se mālama fou o loo i ai nei i lona oso a'e.

Ua lē toe mafai ona taofi.

“O ai lea ua lē ‘ano’ano le soli mai o le malumalu o Apolo?” na valaau atu ai le Perofeta o Talefaia.

Sa mamafa e pei o ni maa le pulato'a a le vaega'au i le ta'ita'i'au, a o ia savali atu e faafesaga'i ma le fafine.

“Aumai nei i luma le teine!” sa faatonu atu ai o ia.

“Ua alu ese. E lē toe mafai ona oo i ai se isi, e lē mafai ona e toe pa'i i ai.”

Na iloa e le fitafita o se mea lea e faigatā ona tupu; o loo si'osi'omia atoa le malumalu. Ui i lea, o lona popole na tuleia o ia i luma.

Na la'a atu le Perofeta e pupuni o ia mai le oo atu i fasitepu. Na tuu atu lona alofilima ma taofi le ufifafata o le ta'ita'i'au. “E sa taputapu ona tuvae se tama tane i le totonugalēmū o le malumalu.”

“A e lē sa ai le emeperoa. Ma o a'u o lana sāvali.”

Sa le'i minoi ese Talefaia. “E te lē sopo atu ma a'u.”

Na tu'ulima atu le faatonuga a le Emeperoa Teotosiusi i le ta'ita'i'au – na tauaao atu e lona lava atalii o Arakatiusi. Ia matua'i fasia atua tuai uma, o latou malumalu ia matua'i soloia uma i lalo. Ia faia faapea i soo se pito o le malo, e aofia ai ma Telefaia. Sa tuuina atu foi i le ta'ita'i'au se isi faatonuga faapitoo faaopoopo. O le a ia usita'i i ai. Na ia sunu'i loloto atu lana pelu i le manava o le Perofeta ma uuna'i atu atoa le pelu i totonu. Na mātala le fofoga o le Perofeta i le te'i, ma mānava mai lana auē i le tiga. Na pa'ū ane i le tau'au o le ta'ita'i'au, e pei o se pa'aga o loo tau fusi ma opoopo. Ae na ia tulei ese atu o ia. Ua pisi solo le toto i lona ofutau ma masa'a solo i le fola o le malumalu.

Na solovī ifo le Perofeta i le ma'a fola, ona taatia lea i lona itu. Sa taumafai atu le isi ona lima o loo gatete e pa'i atu i le potopotoi o lona lava toto. Na mafola ai lona alofilima ma taofi ai. “O se vaipuna fou...” sa ia musumususu atu ai, e peisea'i o se folafolaga. Ona lē toe gaiōi ai lea o lona tino ua maliu. Na la'a ese atu le ta'ita'i'au i ona luga ma savali atu faatasi ma lana pelu o loo sauni, i fasitepu agai i lalo i se ana ititi. Na ia tau atu i le tino maliu o se loomatua, sa fanaina i se u, o loo taatia i le faaputuga toto. Sa i ai se nofoa tafatolu o loo taatia faa'autafa i tala ane o se ta'e i le fola. Sa ia saili solo i tulimanu uma o le potu ma toe fāliu faataamilo atoatoa. O se mea e ofo ai e lē talitonuina.

Sa matuā gaogao atoa le potu aunoa se isi o i ai.

*(Sosoo atu Sulu Samoa Setema 2021)*

---

## O A TATOU MEA'AI E TATAU MA LE ASO

Aso Faraile, 27 Aokuso 2021.

O le numerā e lē mafaitauina.

Tusi Faitau: Fa'aaliga 7: 1 – 9, “*Ua mavae atu ia mea, ona ou iloa lea, faauta foi i le motu o tagata e toatele mai atu nuu uma, ma aiga, ma nuu, ma gagana eseese, e le ma faitaulia e se tasi, o loo tutu i latou i luma o le nofoālii ma luma o le Tamai Mamoe, ua oofu i latou i ofu sisina, ua i ai foi lau pama i o latou lima.*”

O le malaga faatasi i le taavale e tasi sa lauiloa i Jamaica a o o'u tuputupu a'e ai. Sa ou fā'atu i faiga malaga ma le tasi tinā sa faamallosia matou e a'o a matou faatele. O se matuā sauāga! O se tasi aso na ou malama ai, o le auala sili e faaititia ai lo'u popole, o le a'oa'oina lea o a'u faatele. Na ou lagona le olioli o le manumalo ina ua ou savalia le faatele o le 12 ma taunuu i le tumutumū:  $12 \times 12 = 144!$  Ina ua ou faitau i le Tusi faitau o lenei aso, o ulua'i fuainumera o le 144,000 na faamanatu mai ai ia te a'u le manumalo. O le puapuaga tele (o loo faamauiina i le Fa'aaliga 6) atonu o loo faailo mai ai le manumalo o le leaga ona o le toatele sa fasiotia. Peitai mo i tatou e faatuatua ia Keriso, ua tatou iloa o le manumalo moni o loo taoto i le mea moni lenei - o le oti e lē o le i'uga lea.

O i latou na sauāina ona o le amiotonu, na tusia o latou igoa i le Tusi o le Ola i le vaitusi lē matineia o le toto o Iesu Keriso ma maua le ola faavavau. E leai se tasi na te toe faasolomuliina lena mea. Ua latou maua le ola faavavau. Ua manumalo a'ia'i Iesu Keriso i le oti ma o Lana galuega mae'a o le faaolataga e lē mafai ona toe sōloi'eseina. O le numerā o loo faatāua iinei o le 144,000 ua faatāina (faailoga ese, faasao e le Atua): o se numerā lē mafaitaulia lona aofa'i e faaopoopo i le motu o tagata e toatele e lē mafai ona faitauina, o e sa latou lialia'i lau pama o le manumalo, auā ua latou manumalo ona o le toto o le Tamai Mamoe.

† Le Alii e, matou te tatalo mo i latou o loo sauāina ona o lo latou faatuatua. Matou te tatalo foi mo i latou sa latou molimauina le maliliu ai o latou aiga ma uō ona o lo latou faatuatua.

---

**Aso Toonai, 28 Aokuso 2021**  
**O ai e aofia i lau faitauga?**

Tusi Faitau: Ioane 10: 11 – 18, “*11 O a’u le leoleo mamoe lelei. E tu’u atu e le leoleo mamoe lelei o lona ola mo ana mamoe...<sup>16</sup>Ua ia te au foi isi mamoe e lē o i lenei lotoā; e tataou ona ou ta’ita’iina mai i latou foi, e faalogo foi i latou i lo’u leo; ona tasi ai lea o le lafu mamoe, ma le leoleo mamoe e toatasi.*”

O se tasi o mala leaga sa matou tauivi i Jamaica o le mativa, ma i nisi vaega o le atunuu, e i ai se toatasi e avea ma tausimea po o le “Faatamāatua”, na te faataunuuina le tele o manaoga faaletino. O se faanoanoaga, ona o lenei ‘Faatamāatua’, na te faia foi ni faatonuga leaga o ona mana’oga, e mana’omia ai le lagolago atu aunoa ma le fesiligia. E toatele aiga matitiva na maua ai i lea mailei. O lenei tagata e toatasi e ta’ua o le ‘Tasi Tonu’. I le Tusi faitau o lenei aso o loo tatou vaaia ai foi se tasi tagata faapea: o le leoleo mamoe e to’ a tasi. Tatou vaaia ia te ia - e lē o le tama o le ata o Rambo po o le Temineita, ae o se leoleo mamoe. Ina ua fetalai Iesu i le lē lava o le auuuna faa-faigaluega e puipuia mamoe, o le a fetai ai lo tatou faapea, o lona tuu faafeagai la o se tagata pei se masini o taua, o se ituaiga toa mata’utia.

Mata o le a faigata mo tagata e soifua i le seneturi luasefulutasi, ae maise pe afai e lē o i totonu o se sosaiete fa’atoaga toatele, le mafaufau o se leoleo mamoe na te lavea’iina i latou. O se ata fuafuaina e lē fesoota’i lelei ma tagata o le meleniuma. O le galuega faaola a Iesu e feteena’i ma o tatou manaoga faaletagata mo se lavea’i, se faaola po o se ‘Tasitonu’. E lē gata o Iesu e puapuagatia i sauaga aunoa ma le fa’aaogāina o le malosi e taofia ai sauaga, ae o lana galuega faaola foi e aofia au tagata uma. Tatou mafaufau atili i lana fetalaiiga faasino i isi mamoe. Ou te fa’aaogā lenei faitauga e mafaufau loloto ai o lenei leoleo mamoe e tasi, na osi le taulaga mo i latou o loo faitauina e i totonu o le lafu mamoe (faata’ita’iga, ua talia e ala i le faatasiga, o le fanau mai, o le ituaiga tagatanuu, ituaiga kenera, ituaiga lotu), ma i latou e manatu le toatele o i tatou e lē taulia ai. Ua lu’iina e Iesu lo tatou malamalama’aga po o ai e aofia. E mautinoa lava, ua tatou manino lelei o Ia le toatasi na te aumaia le faolataga, o Ia le toatasi e alofa e oo i le oti, ma o lona alofa e aofia ai tagata uma.

†Le Atua e, o lau afio e tasi. E leai se isi e faaluaina lau afio, leai se isi e sili atu, leai se isi na muamua, leai se isi e mulimuli mai. Ia e faatasia i matou ia tasi i le matagofie o le tasi o lau afio. Amene.

**Mo Mafufauga Atili:** O le a le fua tatou te faatulagaina ai le agavaa o isi tagata ina ia maua faamanuiaga? E faapefea ona ofoina mai e Iesu mo i tatou se faataitaiga o le alofa tunoa?

**Aso Sa, 29 Aokuso 2021**  
**Manatu Aoao Vaiaso – O TUSI I EKALEZIA**  
**Manatu Autu Aso Sa – O meli taualoga**

Tusi Faitau: Fa’aaliga 1: 4 – 11, “*8 O a’u le Alefa ma le Omeka’, ua fetalai mai ai le Alii le Atua, ‘o loo soifua, na soifua foi, o le a afio mai, e ona le malosi uma lava.*”

O le a’oa’oina o le Tusi o Fa’aaliga e pei o se folaulauga i le sami: e manaia i le amataga, a e faafuase’i lava ona e i fafo mai lou sone mafanafana ma saili se ofu faaola! ‘Aua le popole, o le vaiaso lenei o le a tatou i ai i le papa’u, o le mea lea tō ese se’evae ma totigi ma se’i tatou savalivali faatasi i le itu papa’u o le vai! O ulua’i mataupu o le Fa’aaliga e pei o se faitauga tuufaatasi i Ekalesia e fitu e mafai ai e tagata uma ona faitau e le tasi le feau i le isi. O le autu, ‘E afio mai o Ia’ o se puna o le olioli i le Ekalesia ma se lu’itau i le lalolagi. O Ioane, lē fa’aāunu’ua ona o lona faatuatua, ua na o se failautusi, ua na toe faamatalaina le fa’aaliga o le Atua i upu ma faailoga.

Iinei, o Iesu ua toe afio mai i le mamalu i ao, ina ia vaaia o Ia e tagata uma, ma tapua’i pe gatete! E le’i sili atu lava lo’u onosa’i nai lo le tauemu agamalū po o le tauemu i le fai ane, O a’u o le Kerisiano, ui i lea ou te iloa a o tusia lenei tala e i ai tagata o le faatuatua e pei o Ioane o loo puapuagatia i le tino poo faaletamaoaga mo lo latou talitonuga. I taimi faapenei, e fai ma faamafanafanaga sili pe a manatua o le malosi o le Atua, lea e le’i solomuli i le tuana’i, o loo lē faaititia foi i le taimi nei. O iina e amata ai la tatou malaga o lenei vaiaso.

†Ia manatua Kerisiano uma o loo potopoto e tapua’i i lenei aso i lo outou nuu, ina ia avea a latou talosaga ma pesega latou te iloa ai le auai mai o le Atua ma Lona siufofoga.

Tusi Faitau: Fa'aaliga 2: 1 – 7, “*A ua ou lē fiafia ia te oe, ona ua e tu'ua o lou ulua'i alofa.*”

I ona po na maoa'e ai lona matagofie, na avea ai Efeso ma taulaga e aupito sili i Asia Itiiti, ona o lona tulaga e taatia tonu i le fesootaiga ala o fefaatauiga agai i Roma. Na ou savali ai i totonu o lenei aai ma e ui lava ina pisi ma toatele tagata tafafao, o loo lagonaina pea o se nofoaga e tāua. I totonu o ona aai vā-āpiapi o loo i ai tōega o faleoloa, fale'aiga, faletalitane, o se fale fai koniseti tele ma malumalu i atua o ia ona po, ae maise lava o Tiana, o lona malumalu sa avea o se tasi o Mata'aga Matagofie e Fitu o le Lalolagi Tuai.

E ta'uleleia e le Keriso Toetu le au Kerisiano Efeso i lo latou lavātia onosa'i mo se taimi umi a o latou fesaga'i pea ma faaosoosoga, o le tete'e mai, o faigatā ma a'oa'oga sesē. Peita'i sa i ai se mea sa le'i matuā sagatonu lelei, ma atonu tatou te lagonaina autasi ma lena au Kerisiano, a o latou militino faatasi ma le felanua'i eseese o talitonuga ma tofotofoga e fepasia'i solo i o latou vā-i-aai. Vaai i tua, o loo fetalai mai ai Iesu, ma vaai pe faapefea ona e suia mai nei taimi uma e tusa o le avea o oe o le nuu faatuatua. Pe afai tatou te faia uma lena mea, o le manatua o le taimi na avea ai sina aloiafi e liua o se afi mumū saesae a o tatou opoopo ma le fiafia o tatou uso ma tuafafine i le faatuatua, ona toe faatusatusa lea o lena taimi ma le taimi nei, mata o le ā se upu a Iesu ia i tatou?

Ou te le'i nofo lava i totonu o taulaga, ae ua ou aliali atu i aafiaga o se lalolagi, pe afai e lē o tete'e atu i le faa Kerisiano, o loo tele mafauauga i mea e faamalieina ai i fiafiaga ma mea faafiafia. O mea nei e foliga mai e tau faaosooso tele toe talafeagai foi. E lē faapea o le faatuatua ua leiloa, ae mafuli i le tulaga ua faavaivaia, ua mu itiiti le vavae. Fai mai Iesu, taofi. Ia manatua, ia salamō, toe faamumū faolaola le afi ma agai pea i luma i le faatuatua!

† Mafaufau ma tatalo i lau savali faatuatua o aso taitasi ma faatusatusa i le taimi a o fou. Ua tupu ma ua matua, po o mana'omia se faafouina?

**Mo Mafuafuga Atili:** Faalautele lou silafia o Kerisiano sauāina i le lalolagi, ma afai e mafai, ia so'oso'o tau'au ma lagolago i taumafaiga uma e faalauiloa ai lo latou puapuagā.

Tusi Faitau: Fa'aaliga 2: 8 – 11, “*Ua ou iloa au galuega, ma lou puapuagā, ma lou mativa – a ua e tamaoaiga!*”

O Semurana o se aai tu vasa matagofie i Asia (ua faaigoa nei o Izmir), na faaleagaina i le tausaga TLM600 ma toe faafou e le ta'ita'i na soso'o ma Alesana le Sili. O le faailoga o le fini, le manulele logologoā faaletalatu'u e toe tula'i a'e i luga mai lefulefu o lona faatafuna'iina, sa fa'aaogāina e faamatala ai le aai lenei, ma o loo atagia foi i upu e faasino i le au faatuatua o loo aumau ai. E leai se upufaaseā po o se faitioga e tasi i nei Kerisiano faamaoni i lo latou gapatia ma puapuagā, ma afai latou te tauivi ma onosa'i teisi, o le a lē pine ona faapei o le fini, lo latou toe tula'i mai ma le manumalo ma silafia le tamaoaiga moni o le alofa ma le mutimutivale o le Atua. Ua iloa e lo matou aiga le tele o taimi e feagai ai ma le faigatā o le 'uti'uti faapea foi taimi o le faula'i mai o mea. Ina ua oo mai aso faigatā o le olaga, sa foliga mai, atonu o se tulaga uiga ese, e faamalosia atili ai ae lē faaitiitia ai lo matou faatuatua, auā sa matou mautinoa o le Atua na Ia tausia lo matou ola e oo mai i lena taimi, na te lē tuulafoa'iina i matou, a e ta'ita'i i matou i le mea o i ai le vao mu'a (Salamo 23). Atonu e lē matua'i aliali mai ai le faailoga o le fini, peitai e tutusa lava lona faamanuiaina, auā o lona uiga, matou te mafai lava ona molimau i le agalelei o le Atua e faavae i lo matou lava olaga na sau a'i i tausaga e tele ua mavae. E faigofie tele ona faavaivaia nisi pe afai e tula'i mai faafitauli o le olaga ma toso ifo ai i tatou i lalo, ma e mafai e le au Kerisiano ona fa'auigaina nei taimi o faamasinoga a le Atua ma oo mai ai lagona pei ua faalataina ma tuulafoa'iina. Peitai o le feau mai lenei aso, e mafai ona toe maua le malosi mai le vaivai, ma taimi o puapuagā e lē tatau ona avea ma taimi e savavali ese ai mai le Atua, a e peitai ia saga faalatalata atili atu ai ia te Ia. Ia faamaoni i lo latou Atua faamaoni ma faamanuiaina ai!

† Ia toe manatunatu i taimi, pe a toe vaai i tua, e te vaia ai le aao o le Atua sa galue i lou olaga, ma ave ai lau faafetai ma le viiga ia te Ia.

**Mo Mafuafuga Atili:** E i ai se auala e mafai ai ona e fesoasoani i tagata puapuagatia i lou nuu, e pei o le ofoina atu o lou taimi i le nofoaga e faasoa mai ai taumafa e latalata ane, po o nisi faalapopotoga fesoasoani faapea?

# O E UA FAI I LAGI FOLAUGA

## LUPEMATASILA LAITIITIMALU RETI FANUELI

**24/5/1959 - 24/7/2021 (62+2+1)**

*“Auā e leai so tatou e ola mo ia lava, e lē oti foi se tasi mo ia lava; auā afai tatou te ola, tatou te ola mo le Alii, pe afai e oti, e oti mo le Alii; o lenei pe ola pe oti i tatou, o tagata lava o le Alii i tatou.” Roma 14:7-8.*

Na soifua mai le afioga i le Tiakono ia Lupematasila Reti Fanueli i ona mātua o Tauā Fanueli o Lalomanu ma Gogoā Fanueli o Lepea, i le Aso Sa 24 Me 1959. Na faaipoipo atu o ia ia Laga’asa Sagapolutele Tanielu o Saoluafata, ma e to’a iva o la’ua alo. O le aso 14 Tesema 2013 na matou osi feagaiga ai ma le aulotu EFKS Toomatagi nei, ma o le afioga i le tiakono ia Lupematasila ma le faletua ia Laga’asa, o le tasi lea matafale malosi na matou osi feagaiga. E le’i māua le tausaga na faae’etia ai lo la’ua tofi tiakono, a e ua lava ma totoe lana tautua sa molimauina e fai ma pine faamau o lona soifua galue, o se tiakono sa pele ia te ia le galuega a le Atua, e ala i ona tiute tau’ave faatiakono. Sa fai ma Failautusi/ Teutupe a le matou aulotu mai le tausaga 2017 se’ia faamavae i le aso 19 Ianuari 2019 ina ua le toe tutusa lona malosi, a e sa tumau pea lona auai mai i sauniga lotu o Aso Sa ma isi sauniga masani.

O le toe galuega sa faia e le afioga i le tiakono ia Lupematasila mo le galuega a le Atua, o lana taulaga na ofoina mo le malumalu tapua’i fou a lenei Ekalesia, lea sa faaulufaleina i le aso 30 Aperila 2021, o le faa-‘ea mālūlūina o le malumalu i lona tau e \$23,700. E manatua pea lenei auauna aogā, i le tele o ana galuega lelei mo le Atua, e lē gata o le Ekalesia, a o lana tausiga faamaoni i le faifeau ma lona toalua ma le fanau.

O le Aso Toona’i 24 Iulai 2021 i le 4.30am, na faafuase’i ona valaau ai lona Matai ma faamānavaina ana galuega i le maota gasegase i Motootua. O la Iesu, **“Le auauna lelei e, ma le faamaoni, ina ulufale mai ia i le fiafia o lou Alii.”**

## **SAUNIGA: Sauniga Faale’aiga:**

O le Aso Tofi 5 Aokuso 2021 i le 4.00 i le afiafi, na molimoli mai ai lona tino maliu mai le maota maliu o Letoa Sefo Pa’u mo lona sauniga faale’aiga na faia i le malumalu EFKS Toomatagi.

Taitai o le Sauniga – Fuaao Fuimaono FS

Tatalo – Charlie Banse FS

Faitauina Tusi Paia & Lauga – Puletua Tapumanaia FS

Na mae’a ona sauniga faaleaiga ona mapu atu lea o lona tino maliu i lona maota mo leoleoga o le po.

## **Toe Sauniga:**

O le Aso Faraila 6 Aokuso 2021 i le 10.00 taeao na faia ai lona toe sauniga i le malumalu o lana Ekalesia EFKS Toomatagi. Taitai o le Sauniga – Fuaao Fuimaono FS. O le susuga i le faafeagaiga ia Epati Amosa FS, o le lupe faalele a lenei Ekalesia o Toomatagi na ia molimoli mai le sa o le afioga i le tiakono i totonu o le malumalu mo ona sauniga faai’u. O ia foi na saunia tatalo o le sauniga. O le faitauina o le Tusi Paia na fofogaina e le susuga Charlie Banse FS, a o le lauga na saunia e le susuga Siaosi Moananu FS. O le molimau autū na saunia e le faletua ia Laga’asa Fanueli o le faletua o le afioga ia Lupematasila Reti Fanueli, ma le molimau faaleagaga sa fofogaina e le susuga ia Fuaao Fuimaono FS.

O le mae’a ai o ona toe sauniga na molimoli atu ai lona tino maliu i le fale maliu o Letoa Sefo Pa’u i Tafaigata mo le faalefulefuina e pei ona sa ia taumāvae ai i le tina ma le fanau.

O la Iesu, **“Amuia e faanoanoa, auā e faamafanafanaina i latou.”**

Ia manuia tele lau malaga lau afioga i le Tiakono, o le tagata o le Alii, sa ola mo le Alii, ua oti foi mo le Alii. Ia saga viia le suafa o le Alii.

*Saunia: Fuaao Fuimaono FS*

*EFKS Toomatagai*

*Matagaluega APIA.*

# O E UA FAI I LAGI FOLAUGA

## NILI FAAUMA ALOI

### LUPEMATASILA RETI LAITITIMALU FANUELI



O le A'oa'o Tausaga Lua o le Kolisi Faifeau Malua, mai le EFKS Fugalei, FALEATA, na maliu i le faalavelave taavale i Taufusi, i le po o le Aso Toonai 21 Aokuso 2021, a o feagai le Kolisi ma lana Tuuaga. Ia faamaise le Atua i le susuga i le Faifeau Pule, Faia'oga ma le Kolisi Malua, faapea aiga & EFKS Fugalei.



**FALETUA TOEAINA PENISIONE, EPENESA POUESI, MALIU 30/6/2021**